

四庫全書

史部

欽定四庫全書

史部

平定準噶爾方略續編卷二十八

詳校官監察御史_臣孫家賢

通政使司副使_臣莫瞻菴覆勘

總校官進士_臣

朱鈐

校對官修撰_臣

戴衢亨

謄錄監生_臣

蔣知廉

欽定四庫全書

平定準噶爾方略續編卷二十六

乾隆二十九年秋七月癸丑

陝甘總督楊應琚等疏奏哈密等營改隸巴里

坤鎮標管轄

楊應琚等奏言查巴里坤提督與烏魯木齊總

兵互相更調經將軍臣明瑞等會議請於本年

十一月初旬先令提督起程移駐荷蒙

俞允臣伏思提督原轄之哈密沙州等一十四營俱在巴里坤之東應就近改歸巴里坤總兵管轄仍屬烏魯木齊提督統轄節制奏入

上從之

甲子

議伊犁添設同知等官事宜

伊犁將軍明瑞等奏言現在伊犁挈眷官兵跟役與商民雜處必有詞訟交涉事件請於兵丁

全到之後設立理事同知一員或從甘肅等處
簡缺裁調或照各駐劄大臣所屬管理糧餉官
員三年更換其內地八旗蒙古律例等書附請
給發以便查照遵行奏入得

旨軍機大臣議奏尋議查各省駐防旗民雜處之地
例設理事同知或通判一員承辦審理詞訟今
伊犁所駐滿洲蒙古綠旗兵丁及商民回人尤
為錯雜詞訟案件必多應如明瑞等所奏設立

理事同知一員但地方新定員缺緊要必須明白敏練熟習滿洲蒙古言語之員始可勝任應請於各部院滿洲蒙古主事及保送頭等筆帖式內揀選發往三年稱職照苗疆例題調所給俸廉似應較內地從優并添設吏役各事宜均請交楊應琚會同明瑞酌核具奏所請律例等書亦由各該衙門查取給發至將軍衙門似應照各省駐防之例設立左右司分印房管理糧

餉倉庫等官并令明瑞酌議具奏奏入

上從之

乙丑

諭叅贊大臣納世通等嚴飭素勒坦沙

副都統楊桑阿等奏言六月初八日拔達克山

素勒坦沙遣使霍濟克蘭呈稱喀什噶爾所屬

和爾罕莊有果園一所係呢雅斯索丕故業今

伊安插京城其妻子仍在拔達克山請以此園

給還等語詢之噶岱默特據稱園業屬實但現已入官無給還之例臣等因素勒坦沙希圖僥倖行文飭駁謹一并錄呈

御覽奏入

上諭軍機大臣曰揚桑阿等奏因素勒坦沙請將喀什噶爾果園一所給還呢雅斯索丕妻子隨行文飭駁等語所辦尚是但書詞稍弱素勒坦沙貪鄙無恥非嚴加斥責不能杜其僥倖之心著改撰書

稿交納世通令其曉示素勒坦沙嗣後伊若妄有
請求務宜嚴行斥責不可稍事姑息

丙寅

宣諭逆回阿卜都喇伊木罪案并議敘議處在事各
官

侍郎五吉等奏言臣等遵

旨審訊逆犯阿卜都喇伊木通書霍罕謀叛情節緣
阿卜都喇伊木向係喀什噶爾伯克自歸附以

來因未授為阿奇木心懷背叛常與額爾德尼致書通問乾隆二十七年冬令伊親屬摩羅郭帕和卓致書額爾德尼告以索取鄂斯游牧一事並未用兵將來遣使到日不必遠迎并約為內應同取喀什噶爾詢之郭帕和卓及伊親信家人哈勒默特呢雅斯薩木薩克等各供無異詰問阿卜都喇伊木亦據實供吐臣等查阿卜都喇伊木本係逆賊霍集占等親信之人因大

兵迫近獻城請降乃心懷叵測通信霍罕謀為
叛逆若僅予斬決不足蔽辜應請將阿卜都喇
伊木凌遲梟示伊子阿卜都瓜里擬斬立決郭
帕和卓哈勒默特雖未起意同謀但聽從寄書
情節可惡均擬斬立決呢雅斯薩木薩克知情
不首應給與厄魯特為奴至員外郎沓穆齊圖
二等待衛庫庫納奉差同往霍罕於此等謀逆
通信之人失於防範覺察伊勒圖雖調往伊犁

但從前並未同永貴慎選幹員咎亦難辭俱應交部分別察議奏入

上諭軍機大臣曰阿卜都喇伊木係逆賊霍集占黨與本應從坐因其舉城迎降既免誅戮復加恩授為伊沙噶伯克乃不知感戴反交通外藩希圖叛逆情節可惡阿卜都喇伊木著即凌遲梟示伊子俱著處斬妻女及兄弟之妻俱送京備賞所有財產查明入官餘依議又

諭曰噶岱默特首發逆謀著加恩賞緞十端納世通
著交部議敘挖穆齊圖失於防範情尚可原但與
額爾德尼相見時不能察其情形有異及伊未曾
出迎之處並不告知駐劄大臣等希圖省事甚屬
怯懦著摘去所戴孔雀翎仍交部嚴加議處永貴
等著交部察議

以阿卜都喇伊木罪狀

敕諭霍罕額爾德尼伯克

皇帝敕諭霍罕額爾德尼伯克從前喀什噶爾駐劄
大臣遣章京托穆齊圖率同伊沙噶伯克阿卜都
喇伊木諭爾給阿濟北鄂斯之地阿卜都喇伊木
潛遣其親信郭帕和卓等致書於爾謂回部和卓
木等皆見誅戮惟爾尚存此次索還侵地來使不
過數人未曾派兵爾但示以不懼勿出迎候且喀
什噶爾等城留兵甚少爾當領衆前來我為內應
等語爾亦權詞相答謂現與丕色勒構難俟可行

時再相約會此等情節皆經發覺審訊明確故將
阿卜都喇伊木等立寘重典家口亦皆從坐大臣
等以爾心懷叵測請發兵問罪朕思阿卜都喇伊
木向隨霍集占等為逆本應誅戮因其獻城納款
是以加恩錄用今負恩謀叛孽由自作爾歸附以
來頗知恭順此次一得逆書若即行首出必重加
恩賞原爾之情蓋恐阿卜都喇伊木或仍狡辯致
生事端是以未敢出首姑緩言相復則與逆犯結

約原非爾本心朕觀爾行止尚屬曉事設爾竟如
所約襲取喀什噶爾豈不思葉爾羌阿克蘇和闐
皆有官兵伊犁有將軍大兵駐劄爾能守喀什噶
爾乎恐大兵一至霍罕安集延盡皆殄滅悔之何
及爾蓋籌計及此故數月以來並未私遣一信知
爾不敢負朕恩而罪尚可逭也今已諭駐劄大臣
等不必進兵爾荷朕包荒大度當益加恭順恪守
藩服以期永保福祿於無窮倘有不逞之徒以叛

逆之事誘脅爾者即據實以聞勿為所愚特諭

庚午

諭陝甘總督楊應琚查核安西牧羣

上諭軍機大臣曰辦理軍需以來安西孳生馬羣內
騙馬多撥征兵乘騎其兒騾馬匹亦有兼備食用
者現在軍務告竣業經數載該處既於牧放為宜
前此撥用所餘之馬曾否孳生蕃庶足以補設馬
羣及此時該督作何籌辦之處著傳諭楊應琚令

其查明具奏

戊寅

命副都統五岱駐劄塔爾巴噶台

上諭軍機大臣曰明瑞奏稱塔爾巴噶台初駐兵丁一切事宜必得歷練之人方可勝任五岱久在軍營稽察防範素所熟悉若令其駐劄該處於諸事有益至其家口似應暫停攜帶等語五岱著駐劄塔爾巴噶台但起程尚需時日著仍挈眷前往伊

犁俟應行駐劄之日即由伊犁起程

阿克蘇辦事副都統卞塔海等疏奏酌購伊犁
羊隻

卞塔海等奏言查本年四月臣德福奏稱阿克
蘇食羊共一千四百餘隻計支給官兵一年及
各項公用約需三千六百餘隻尚不敷用請採
買羊六千隻內須得牝羊千餘隻以便孳生續
准明瑞行知伊犁有貿易之哈薩克等羊隻頗

多每隻價銀八錢臣等以伊犁羊多價賤可以節省經費咨覆明瑞先購一千餘隻俟河水消減送至阿克蘇再購二千隻陸續解送臣等更於貿易回人等羊隻內視其價賤多為購買務足六千之數庶孳生日多而公用無缺奏入報

聞

八月辛巳

恩免甘肅臯蘭等處本年地丁錢糧

上諭大學士曰甘省鞏昌府屬前此雨水未足時厯
朕懷今據楊應琚奏六月間連次得雨田禾仍屬
有秋惟臯蘭等州縣廳屬不及補種秋禾應查勘
辦理等語該處緣邊土瘠雨澤未徧歲事歉收朕
心深為軫念該督其速飭所屬悉心察勘實力奉
行無使災黎失所因念西陲辦理軍務時歲歲加
恩蠲除止賦茲大功告竣已閱數載於甘民未沛
特恩今秋成既有歉收民力未免拮据著加恩將

被災較重之臯蘭等十二州縣廳稍輕之河州等
十八州縣廳及靈州中衛縣屬之被災旱地所有
本年應徵地丁錢糧概予蠲免該督其董率有司
妥協辦理毋致胥役人等中飽侵漁副朕加惠元
元至意

諭陝甘總督楊應琚籌酌新疆接壤居民遷移開墾
上諭軍機大臣曰楊應琚奏甘省臯蘭等三十二州
縣廳均有被災之處已降旨查勘賑恤並加恩蠲

免額賦厚示撫綏因念該處現在收成歉薄緣邊
瘠土之民生計未免拮据年來新疆屯政屢豐如
烏魯木齊等處糧儲甚為饒裕且其地泉甘土沃
並無旱潦之虞如令該省接壤居民量其道里近
便遷移新屯各處則內地資生既廣而邊陲曠土
愈開實為一舉兩得著傳諭楊應琚令其悉心體
察隨民情所願設法開導善為經理仍一面熟籌
詳議奏聞

乙酉

諭葉爾羌叅贊大臣額爾景額等辦理博洛爾等游

牧事宜

上諭軍機大臣曰額爾景額等奏稱博洛爾伯克沙
瑚沙默特之弟阿玉卜至葉爾羌告稱齊特喇爾
邁瑪特什丕與海魯蘭相約掠其村莊請兵復讐
伊等行文詰問仍令各吐實情再為辦理務服其
心等語看來邁瑪特什丕與阿玉卜等俱係兄弟

生隙自相搶掠尚非大事額爾景額等止當如此
辦理或伊等將來再有文移應嚴詞斥責若能完
局更善即尚須辦理亦第遣伯克薩里等知其性
習之人前往曉示若阿玉卜等仍有請兵之語當
諭以大兵不可輕動一動則經過各部落妄生驚
恐豈有爾兄弟不和致發大兵俾霍罕拔達克山
等處驚恐之理此事斷不可行則伊等自無詞復
請俱著傳諭知之

丙戌

議伊犁設立理事同知事宜

陝甘總督楊應琚奏言准將軍明瑞咨送奏稿
設立伊犁理事同知查該同知承辦旗民事務
自應專設實缺查涼州莊浪官兵俱移駐伊犁
其西安移駐兵數無多止須於涼州設理事通
判一員其涼州理事同知即請裁移伊犁但現
任同知長祿未通曉蒙古語言應請在部揀選

至伊犁事務較繁一切公費請照烏魯木齊同知之例支給奏入得

旨軍機大臣議奏尋議伊犁為新疆要地兵民雜處必須專設理事人員以清案牘今該督請將莊浪通判移駐涼州涼州同知移駐伊犁應准其裁移改設由各部院衙門揀選通曉蒙古語言之主事等官補授照邊缺三年應陞之例陞用其養廉公費既較內地加增應令該督等會同

將軍明瑞辦理奏入

上從之

葉爾羌叅贊大臣額爾景額疏奏查辦和闐稅務事宜

額爾景額等奏言近因阿奇木伯克鄂對查出葉爾羌貿易回人二百餘名照舊例交二千騰格錢文其和闐亦飭和成詳查據報伊沙噶伯克古爾班和卓等呈編查六城貿易回人共八

十五名除上年派往屯田外所餘五十六名亦
願照葉爾羌例酌交五百騰格錢文但伊等因
從前辦理和闐田賦時已有應交正項錢糧且
俱以耕織為生不似葉爾羌回人之專於貿易
自不便重徵其稅若將應交錢文攤派各城回
衆雖屬無多亦覺稍有擾累臣等愚見似應豁
免仍令專交正項錢糧以裕回人生計奏入報

聞

癸巳

命允回人酌助屯田資裝仍照例給賞

上諭軍機大臣曰額爾景額等奏稱由葉爾羌和闐
派往伊犁回人五百戶原議官辦資裝起程而阿
奇木伯克鄂對等再三懇請照舊捐助已曉示鄂
對等將回人現有零星什物准其協助至衣服路
費仍由官給等語各城資送回人朕惟恐稍有擾
累諭令概從官辦今額爾景額等既據回衆情詞

感恩圖報即照所請量行協助其衣服路費自應
動支帑項至協助之回人等著查明照例給賞以
示體恤

戊戌

恩免阿卜都喇伊木緣坐親屬阿卜都克勒木等正
法

上諭軍機大臣曰納世通等奏稱阿卜都喇伊木之
弟阿卜都克勒木等俱係叛逆親屬應行緣坐之

犯擬以斬決候旨正法等語阿卜都克勒木等按律自應正法但與阿卜都喇伊木誼屬兄弟尚非子嗣可比著加恩免死送至京師賞給王大臣等為奴仍傳諭回衆知之

庚子

命領隊大臣伊勒圖等分駐伊犁雅爾等城

軍機大臣奏言伊犁等處駐劄大臣前奉

欽定叅贊大臣二缺領隊大臣四缺又經奏准將五

岱派往塔爾巴噶台其駐劄烏魯木齊大臣綽克托訥蘓懇伍彌泰李景高等四員移駐雅爾城但雅爾事務不繁無須多人辦理伊犁現有叅贊大臣一缺或就此四員內揀選補授前往塔爾巴噶台或將愛隆阿派往伏候

欽定奏入

上諭軍機大臣曰伊犁雅爾等處設領隊大臣四員尚覺不足著增為六員伊犁酌派四員雅爾酌派

二員伊勒圖鄂津觀音保勒克著駐劄伊犁五岱
訥蘓懇著駐劄雅爾綽克托著授為叅贊大臣駐
劄塔爾巴噶台伍彌泰李景高仍留烏魯木齊同
五福辦理屯田貿易事務奏事時伍彌泰列名在
前綠旗兵事務著五福管理俱聽伊犁將軍節制
伍彌泰李景高或一處駐劄或分駐庫爾喀喇烏
蘇著該將軍議奏

丁未

諭定邊左副將軍成袞扎布停送伊犁羊隻

上諭軍機大臣曰成袞扎布等奏稱解送伊犁羊三萬隻應令派往厄魯特及錫伯兵丁分領前往其烏里雅蘇台需用羊隻處頗多據台吉羅卜藏齊旺願進羊三千隻可否收受或另行採買等語伊犁駐劄官兵雖需羊頗多而哈薩克布魯特等不時前來貿易所市羊隻尚可敷用著傳諭成袞扎布等祇須辦羊一萬五千隻交厄魯特等解送錫

伯兵丁不諳牧養其餘羊即留烏里雅蘇台應用
羅卜藏齊旺所進亦不必收受併諭明瑞等知之

九月庚申

諭喀什噶爾叅贊大臣納世通等辦理霍罕事宜

上諭軍機大臣曰納世通等奏厄魯特博羅齊等自
瑪爾噶朗逃來告稱額爾德尼伯克所居城外仍
有厄魯特千餘人又今春遣使霍罕後額爾德尼
伯克領衆往侵和濟雅特丕色勒中途忽行撤回

據伊屬人互相傳說恐大兵前來厄魯特必然歸
附莫若先行擒殺我等聞風逃走現在遣親信回
人潛入霍罕偵探如無他故即將博羅齊等送往
伊犁等語額爾德尼伯克撤兵防範厄魯特等不
過因阿卜都喇伊木交通事覺恐大兵問罪欲為
守禦計耳豈敢圖謀喀什噶爾如果有此心則從
前阿卜都喇伊木潛通信息時何不統衆相應朕
昨以阿卜都喇伊木罪狀勅諭額爾德尼伯克伊

得旨知己免其加兵自然安守游牧若納世通等以全無影響之事偵探張皇恐喀什噶爾回衆聞之轉啓猜疑著傳諭納世通等將此事姑置之不必遣人往探

伊犁將軍明瑞等疏奏查辦邊界哈薩克等情形

明瑞等奏言此次察哈爾總管達克塔納領兵五百解送羊隻中途馬甲朋蘓克等俱迷踪未

回臣等正在察詢忽朋蘓克與厄魯特男婦五人同來告稱因馬乏落後入哈薩克托克托郭勒等所居被其拘留復乘間與厄魯特等商謀脫出臣等派兵一百名往拏所供之哈薩克等并收其牧羣旋據全行拏獲又查出察哈爾車卜騰因馬乏病卧有哈薩克哈藏哈卜起意欲買車卜騰役使以銀付同行之彥扎卜彥扎卜貪利允從次日遂以病故報知該管官查彥扎

卜貪利無恥應請傳集哈薩克人等將伊正法
示衆車卜騰重責枷號滿日發往葉爾羌給官
兵為奴哈藏哈卜重責釋放托克托郭勒起意
拘留官兵應請正法示衆收其馬匹入官其餘
人馬匹仍給還原主朋蘓克因病被拘旋行脫
出仍令照舊差操其該管官達克塔納等請交
部分別嚴加議處奏入得

旨所辦甚是如所請行

辛未

諭科卜多叅贊大臣雅郎阿確查屯田歉收情形

上諭軍機大臣曰雅郎阿奏稱科卜多屯田計各項
籽種一千二百石共收穫四千二百石等語看來
所收分數僅三分以上即使土性寒冷耕種已經
數載何以歉收若此著將實在情形及上年分數
若干查明具奏

諭陝甘總督楊應琚查辦巴里坤孳生馬匹

上諭軍機大臣曰楊應琚覆奏廠地孳生馬匹一摺
該督前因巴里坤廠地寬廣水草豐美是以將安
西等處存剩馬匹改撥巴里坤牧放該處自立廠
以來節年孳生自應日就蕃庶何以綜計各處所
報為數僅及萬匹因思烏魯木齊貿易馬匹尚多
巴里坤廠地既佳何不陸續趕赴牧養此處應與
綽克托等會商至奏內所稱本標暨附近各營陸
續撥用一節亦未詳明標營馬匹缺額合例者准

其買補過多者另應著賠斷無營馬數虧徑將廠馬抵數之理或者甘省向例如此亦應詳悉聲明此後何以廣為孳生設法妥辦之處著傳諭該督令其再行詳查覆奏

諭陝甘總督及江浙巡撫織造等申嚴辦解貿易緞疋處分

上諭軍機大臣曰楊應琚奏原任杭州織造赫達色解到貿易紬緞內有霉黥二百餘疋請發回著落

經手承辦人員賠補并請嗣後各織造起發時俱令委員驗同包裹一摺所奏甚是哈薩克久經內屬貿易緞疋雖物料稍次亦不敢過為爭執但國家嘉惠遠人所給之物自必令其可以適用斷無一任承辦人員便宜減省致所入不償所出之理況前此傳諭不啻再三該織造自當遵照辦理何得潦草塞責以致霉黥二百餘疋之多此項即著解員帶回令原辦人員按數賠補嗣後各織造所

辦紬緞一面移明督撫令派出解員公同點驗封
解其到甘時楊應琚係總匯之處務須詳悉查檢
如驗有質地純薄丈尺短少以及霉黠等弊該督
即嚴行駁回著落原辦人員賠補並將公同點驗
之員交部議處如驗係中途水漬擦損即著落解
員賠補還項以專責成可將此傳諭各該督撫織
造等知之

壬申

喀什噶爾叅贊大臣納世通等疏奏詢問霍罕
等處貿易回人情形

納世通等奏言近據卡倫報稱霍罕有貿易回
人七名前來臣等查看貨物甚少恐係偵探信
息因令噶岱默特等設法詢問據稱我伯克常
向和濟雅特之丕色勒爭戰今春正在領衆前
往因聞伊沙噶伯克阿卜都喇伊木通信事發
遂即撤回再瑪爾噶朗有厄魯特五人脫逃額

爾德尼伯克即欲將餘人盡戮恐內地聞信不
果但收其馬匹軍器今霍罕所部俱傳說有大
兵前來又聞上年赫舍勒巴什之伯克岱音沙
報愛烏罕愛哈默特沙之讐取其九城今年又
取兩城愛哈默特沙力甚窮乏等語臣等查噶
岱默特遣親信回人偵探未歸今將詢得霍罕
來人之言先行具奏奏入報

聞

丙子

諭伊犁將軍明瑞等毋庸偵探霍罕等處信息

上諭軍機大臣曰明瑞等奏自哈薩克來投之厄魯特等稟稱霍罕額爾特尼伯克與哈薩克阿布賚等遣使往來恐有勾通情事似應潛遣間諜令其彼此相猜至喀什噶爾地近霍罕布魯特已行文納世通等偵探信息即行知會等語昨據納世通等以額爾德尼伯克往攻和濟雅特丕色勒聞有

大兵來信撤回游牧已遣回人往探具奏朕即謂
伊等不過聞阿卜都喇伊木叛情發覺倉卒守禦
耳斷無窺伺喀什噶爾之意業經勅諭額爾德尼
伯克伊奉勅後自必心安明瑞等所聞亦不可信
以為實哈薩克阿布賚等尚不能約束所部何敢
與霍罕合謀藉令相合又誰為主而誰為僕哉且
伊犁駐兵甚多亦復何慮著傳諭明瑞等不必潛
遣間諜祇以無事處之稍有張皇反啓內地厄魯

特回人等疑懼此時無論伊合謀與否惟加意練兵積穀為要可將節次諭旨錄寄明瑞等閱看此後或別有見聞仍即具奏毋因此旨遂一切置之不問也又

諭曰明瑞等以所得霍罕哈薩克勾通信息知會納世通朕前諭納世通之旨已錄寄明瑞矣此時納世通得明瑞知會不必張皇辦理再前所降額爾德尼伯克勅諭命納世通派員賫往但所遣必須

幹練之員若似挖穆齊圖之怯懦隱匿實情則於
事無益著傳諭納世通將派何人賫勅前往及回
報情形若何即行具奏

以審明索倫官兵情罪未經陳奏

飭諭定邊左副將軍成袞扎布等

上諭軍機大臣曰明瑞等奏稱帶領第二起索倫兵
之副總管署營總色爾默勒圖查出兵丁內有將
家口重報遺漏及多領馬銀緣由至烏里雅蘇台

告知將軍成衮扎布等審明移咨黑龍江將軍又令伊等至伊犁時即行稟報除將伊等浮支銀兩口糧撤出分別應行補給及交還庫項外應將此等辦理率混之官兵分別斥責行文將軍富僧阿照例辦理等語此次派往索倫兵所報家口不符及支給俸餉種種錯繆皆起程時辦理不善所致著照明瑞等所奏行但色爾默勒圖等既經告知成衮扎布審明咨辦自應即行具奏似此應奏不

奏該將軍及叅贊大臣所司何事著傳諭申飭

戊寅

以辦理霍罕事宜過於疑懼

飭諭喀什噶爾叅贊大臣納世通等

上諭軍機大臣曰納世通等奏稱據遣往霍罕偵探

回人所告與從前來投之厄魯特及霍罕貿易回

人之言相似專候奉到勅諭即派員外郎四十七

藍翎侍衛官長保等賁往等語此事伊等初奏時

朕即鑒及額爾德尼伯克不過倉皇自守何敢有
窺伺之意屢降諭旨甚明納世通等何過於疑懼
若此至賈送勅諭必擇明白信實尚知自愛之人
四十七久歷外任並未習熟蒙古風俗亦柁穆齊
圖之流豈能辦事官長保性最怯懦前進勦厄魯
特時曾經獲咎遣伊同往徒為外藩所輕舒常鄂
蘭現俱在彼何為不遣耶著速傳諭納世通等額
爾德尼伯克斷不敢來窺伺惟謹遵朕旨靜以鎮

之如四十七等業經起程則已若尚未則派舒常
前往昨明瑞等奏額爾德尼伯克與阿布賚通和
遣使已知會納世通等語想納世通等一聞此信
必至於張皇失措并著傳旨申飭毋得仍前疑懼

平定準噶爾方略續編卷二十六

欽定四庫全書

平定準噶爾方略續編卷二十七

乾隆二十九年冬十月庚辰

諭烏魯木齊辦事散秩大臣伍彌泰嚴行約束遣犯
上諭軍機大臣曰烏魯木齊所有遣犯甚多自應嚴
行約束毋任脫逃滋事從前旌額理在彼尚能約
束安靜今更替回京著傳諭伍彌泰務循照旌額
理所辦章程加意約束若少有疏懈以致乘間逃

走滋生事端惟於伍彌泰是問併傳諭五福知之

庚寅

飭諭烏魯木齊辦事副都統李景高

工諭軍機大臣曰李景高奏請派伊前往雅爾効力
一摺該處與烏魯木齊俱係一體辦事並非有進
兵要務何必告請前往若駐劄大臣皆如此陳奏
則烏魯木齊又將以何人辦事乎可見伊並非實
心願往特因有留伊在烏魯木齊之旨故以一奏

塞責且以見其有志奮勉耳著傳旨申飭

甲午

飭諭伊犁將軍明瑞等發往伊犁步甲錢糧毋庸全給

工諭軍機大臣曰明瑞等奏稱自京發往伊犁令充步甲兵丁三十三名請附於挈眷兵丁旗分視其悔過自新者將伊等餘丁一同挑選等語此等發充步甲俱係怙惡不悛之人即給以錢糧亦應減

半豈可與挈眷駐防兵丁一體全給至伊等不能度日乃其自取有何可憫且自京遣發一匪人伊犁轉增一額缺有是理乎如此籌辦則涼州莊浪遷移之兵又當作何辦理惟伊等子孫罪不相及揀補餘丁尚屬可行著將現在步甲三十三名俱給與一半錢糧其餘丁准與舊兵一體挑補明瑞著傳旨申飭

伊犁將軍明瑞等疏奏驅逐越界哈薩克等情

形

明瑞等奏言前因伊犁以北塔爾巴噶台等處
有越界游牧之哈薩克等族經該頭目阿布勒
比斯約束遷移臣等又派員查逐雖寒冬雪盛
不能無潛來度歲之人但來年正月烏魯木齊
大臣移駐雅爾自可沿路巡查至伊犁西南沙
喇擘勒吹塔拉斯特穆爾圖淖爾等處今年七
月間有潛住之哈薩克等因辦理挈眷官兵無

暇前往惟於前來貿易人等嚴加申飭九月初
沙喇臂勒一路有來投厄魯特等五十餘口告
稱聞貿易人等有大兵即來驅逐之信哈薩克
等晝夜遷移我等始得脫出觀此則哈薩克等
畏我兵威不敢稍抗但出入無常亦非體制臣
等愚見今冬雖不必派兵而來歲北邊駐兵後
其西邊一帶或每年巡查一次或大示懲創務
令絕跡臣等再行相機辦理奏入報

聞

乙未

飭諭喀什噶爾參贊大臣納世通等辦理霍罕事宜
上諭軍機大臣曰納世通等奏稱奉到頒給額爾德
尼伯克勅諭隨派四十七等恭齋前往又預備賞
給緞布茶葉等語從前納世通奏報額爾德尼情
形意涉張皇惟怯朕屢經訓諭至所派四十七等
皆未經練事體恐貽外藩嘲笑今又預備賞賚尤

為非體此次勅諭係加恩免罪派人前往尚當嚴
詞斥責有何應行給賞之處看來伊等從前相機
辦理不過空言非真有成算也設額爾德尼果有
侵擾內地之力何不與阿卜都喇伊木協謀舉事
而克坐視其敗露耶且伊果欲內侵非賞賚所能
止遏如其無力則斥責又豈能債事辦理邊務大
臣豈可憤憤如此納世通等著嚴加申飭再挖穆
齊圖等前往霍罕於額爾德尼未曾出迎匿不具

報此次四十七官長保至彼額爾德尼若仍不知
恭敬伊等當作何面斥之處亦應預為指示曾否
如此辦理並著據實奏聞

命原任布政使栢琨前往喀什噶爾協辦事務

工諭軍機大臣曰原任布政使栢琨著賞給副都統
職銜前任喀什噶爾協同納世通辦事楊桑阿在
彼年久著即回京

丙申

諭參贊大臣納世通與副都統栢琨和衷辦事

上諭軍機大臣曰近因納世通辦理霍罕事務殊乖
體制已屢加訓示因思喀什噶爾回人應照蒙古
情形辦理栢琨熟習蒙古語著賞給副都統銜前
往協辦此特因邊陲要地多一人則有所商榷栢
琨至彼納世通固不當存推諉之見栢琨亦不得
以曾奉特遣遂任意自專除面諭栢琨外仍傳諭
納世通務期和衷集事辦理盡善則伊二人之功

不善亦伊二人之咎若稍存彼我之見則為回人
譏笑矣至奏事列名仍著納世通在前

癸卯

議烏魯木齊總兵移駐巴里坤事宜

軍機大臣奏言楊應琚明瑞等議覆烏魯木齊
總兵移駐巴里坤及應行裁撤大臣官兵辦理
一切事宜列為四條得

旨軍機大臣議奏臣等酌議一巴里坤原設提標中

左右三營官兵今改為鎮標應聽該總兵管轄
其由各標營派往辦差人員應請撤回原營查
從前因軍需繁冗是以派出各標人員協助今
大功告成辦事大臣亦經裁撤自應將本標人
員差遣餘俱撤回一巴里坤現無駝隻惟餘馬
四百五十餘匹應用軍務文案悉交該總兵接
管查駐劄大臣既撤馬匹等項應聽該總兵管
理其庫貯軍械屯田軍臺効力贖罪人員遣犯

等事均照原定章程辦理一巴里坤原設滿漢
檔房均請量留委署筆帖式及書役辦理查滿
檔房原設署筆帖式六名漢檔房原設書役十
二名請各留二名俟營伍字識熟習後再行裁
汰一烏魯木齊總兵既經移駐應請換給印信
查提臣移駐烏魯木齊仍統轄安西等處原領
關防無庸更換至烏魯木齊總兵應換給鎮守
巴里坤等處總兵之印字樣其中軍遊擊關防

亦一體更換以昭信守奏入

上從之又

諭曰巴里坤現在移駐總兵俟駐定時著鍾音回京
富明安既前往該處未久著調赴葉爾羌辦事舒
泰著往雅爾更換訥素懇回京

十一月癸丑

參贊大臣綽克托等疏奏瑚圖畢城垣營房告

竣

綽克托等奏言上年九月臣旌額理等請將羅克倫屯田兵丁移駐瑚圖畢先行葢造營房一千二百間即趨築城垣隨派叅將吳士勝於十一月砍伐蘆葦木植輓運口糧籽種本年三月興工葢造營房臣等續奏請將吳士勝派往塔爾巴噶台辦理城工又派出原任主事伏魔保協辦瑚圖畢城工務期早竣至九月二十九日瑚圖畢城垣門樓倉庫及哈薩克貿易館舍公

署營房俱已告竣計城垣周圍三里五分高一丈六尺臣等前往查勘與原估式樣無異且甚屬堅固其支給鹽菜米麵飼秣馬匹芻豆俱繕冊請銷再臣等伏查各處城堡工竣並蒙

恩錫嘉名并將城垣房舍繪圖恭呈

御覽奏入得

旨吳士勝伏魔保俱著交部議敘尋

欽定瑚圖畢城名曰景化城東門曰熙景西門曰寶

成南門曰阜薰北門曰溥信

乙卯

命陞參將馬虎為副將賞給吐魯番公木薩緞疋
上諭軍機大臣曰明瑞等奏稱賞給副將職銜之參
將馬虎辦理屯田事務所收糧石較去歲為多公
木薩辦理回人諸務及協助城工木植均屬奮勉
等語馬虎著加恩即以副將用木薩著賞緞六疋
命議敘辦理屯田官員

上諭軍機大臣曰明瑞奏本年綠旗兵丁屯田較去年多收糧四百餘石等語官員著加恩交部議敘兵丁等分別賞給鹽菜銀兩

命新疆効力贖罪大員不得循三年報滿之例

上諭軍機大臣曰明瑞等以原任吉林將軍薩喇善効力三年屆滿具奏甚屬非是薩喇善獲罪發往即逗遛不前自應少為留待明瑞何以代為陳奏嗣後武職一品大臣文職二品以上大臣獲罪發

往伊犁葉爾羌等處効力自贖者三年屆滿不必具奏其武職二品以下文職三品以下人員俟三年期滿之時仍照例請旨

伊犁將軍明瑞等疏奏烏魯木齊三屯量留大員事宜

明瑞等奏言臣等欽奉

諭旨伍彌泰李景高仍留烏魯木齊辦事或一處駐劄或分駐庫爾喀喇烏蘇之處交臣等議奏查

庫爾喀喇烏蘇等三屯駐兵八百名分之則每屯止二百餘名俱有文武員弁管轄若仍留大臣駐劄未免煩費臣等愚見仍令伍彌泰等在烏魯木齊同五福辦事如有巡查事務三人更替其三屯錢糧俱歸於烏魯木齊管理似有裨益且晶河駐劄侍衛額爾德蒙額未經派調若以之總管三屯如事關重大先報伊犁其尋常案件就近報知烏魯木齊亦足以資管轄臣等

商之綽克托等意見相同如蒙

俞允則庫爾喀喇烏蘇等處辦事人員亦可酌留協助奏入

上從之

乙丑

恩卹協辦大學士戶部尚書一等武毅謀勇公兆惠
上諭大學士曰協辦大學士戶部尚書一等武毅謀
勇公兆惠質性精勤材猷明練西陲之役稟承廟

略式畀元戎盤錯屢經膚功懋集是用酬庸晉爵
協贊禁廷入直宣勞正資倚任昨偶嬰微疾遣醫
診視方意稍加調攝卽冀就痊遽聞溘逝深為軫
悼即日親臨奠醊著加恩晉贈太保入賢良祠并
賞給內帑銀五千兩治喪念伊子尚在年幼著派
同族工部侍郎官保并內務府司官一員代為經
理所有應得卹典該部仍察例具奏

已巳

定邊左副將軍成衮扎布等疏奏烏里雅蘇台
城工事宜

成衮扎布等奏言前經臣等奏准烏里雅蘇台
築城一事隨咨明山西巡撫派兵一百名又據
扎薩克圖汗等部落協助人夫牛隻臣等查烏
里雅蘇台土性鬆浮難興版築似應照舊伐木
造城所有舊城在齊格爾蘇特烏里雅蘇台二
河之間擬加高一丈六尺厚一丈周圍共五百

丈內外排樹木柵中實以土東西南三面有門
北面近河掘溝引水以環三面即以溝中餘土
築城此時先行伐木其現到兵丁令於近山駐
劄俟春融興工奏入報

聞

庚午

伊犁將軍明瑞等疏奏移駐官兵事宜

明瑞等奏言臣等會議雅爾駐兵一事經軍機

大臣議覆准行今為期已近臣綽克托等先派
索倫官兵巡查驅逐哈薩克等續領官兵帶運
糧餉籽種器具起程所有應行事宜謹開列具
奏一烏魯木齊籽種不敷備帶臣等議將伊犁
存貯之項協濟仍令叅將吳士勝等於瑚圖畢
等處撥運其軍器火藥亦揀選帶往一城工農
務所需器具烏魯木齊存貯之項尚足敷用仍
於綠旗兵內挑選匠作購辦物料以備臨時添

補一輓運車輛共需八百有餘每車馬一匹俱
於牧羣撥用仍量帶餘馬以備疲之一庫貯緞
足除酌量存留烏魯木齊以備哈薩克貿易外
餘皆帶往可省陸續運送之費一前議雅爾駐
兵哈薩克有前來貿易者量收牲隻以備屯田
其大隊商販仍令前往伊犁但恐哈薩克等貪
圖就近不復前往伊犁其價值應行酌減再預
備賞給之緞布茶葉均請照伊犁之例辦理奏

入報

聞

乙亥

飭諭叅贊大臣納世通等辦理霍罕事宜

上諭軍機大臣曰納世通等奏稱四十七等至霍罕
令額爾德尼伯克出城恭迎勅諭額爾德尼隨具
奏章懇求帶回又遣貿易人等投遞呈文俟四十
七轉回再將霍罕情形具奏等語所辦非是額爾

德尼既有奏章縱不能親身前來亦應遣其頭目
賫送乃僅交四十七代進而納世通遂為陳奏殊
乖體制總由伊等心存怯懦四十七等又必以為
辦理不易遂至一味姑息著傳諭納世通等此時
若霍罕貿易人等不知四十七接受額爾德尼咨
文一事即行文額爾德尼云我大皇帝頒降勅諭
尚遣侍衛前來爾既有奏章理應面陳縱爾難以
輕離游牧亦當派一大伯克齎捧入覲乃附懇代

進殊屬不合一面將原奏駁回倘業經准其代進
即不必如此辦理總之曰人性習狡斷不可示
以柔弱納世通等嗣後辦理外藩諸事務知大體
不可存苟且塞責之見

十二月壬午

命增伊犁厄魯特兵丁名糧額缺

上諭軍機大臣曰明瑞等奏稱現在伊犁厄魯特兵
一千二百名內僅二百名每月餉銀一兩請再增

二百二十名額餉合計六佐領各得月餉七十分
等語著照所請將厄魯特六佐領新舊共定額餉
四百二十分以裕兵丁生計

諭伊犁將軍明瑞等偵探霍罕哈薩克情形

工諭軍機大臣曰明瑞等奏哈薩克阿布勒比斯遣
厄魯特策伯克呈稱布魯特掠伊所屬八十餘名
口布魯特百餘人亦為哈薩克所獲今布魯特遣
人與阿布賚阿布勒比斯約會須面同理說今阿

布賚等俱往邊界但阿布勒比斯原與額爾德尼
相好或藉口和解陰相勾通亦未可定已行文納
世通等密查布魯特等果否實有其事再為相機
辦理等語額爾德尼伯克素非安靜之人近因阿
卜都喇伊木通信事發妄生疑懼業經頒給勅諭
續據納世通奏所遣侍衛四十七等報稱額爾德
尼伯克情形尚屬恭順又諭將往返情節確查具
奏今布魯特哈薩克講和之說或出於哈薩克等

誇張其詞此時宜加意偵探若果有勾通形迹必
係額爾德尼伯克潛為煽誘即當乘其不備先將
額爾德尼辦理然此特留心防範之舉不可輒自
張皇恐伊犁兵民等傳說驚疑於事無益併傳諭
納世通等遵照辦理四十七應亦轉回著將額爾
德尼及所屬情形作速奏聞栢琨亦著一體加意
偵探防範

癸未

諭葉爾羌叅贊大臣額爾景額等查辦各城交收布
疋事宜

上諭軍機大臣曰據額爾景額等奏稱和闐每年所
餘糧石除折收紡絲布疋外仍收金三十兩今駐
劄伊犁官兵頗多布疋尤為緊要請將金三十兩
亦折收布疋每年可多收布二千疋等語和闐折
收金兩亦退荒土貢之意業已照例徵解不必折
收布疋若為官兵衣服起見則葉爾羌應收正項

錢糧俱可折給布疋或將餘銀採買亦可著傳諭額爾景額將應送伊犁布疋不足若干葉爾羌等城正項錢糧及所餘普爾糧石若干是否足敷辦解即行籌議具奏

己丑

申飭叅贊大臣納世通等辦理霍罕事宜

工諭軍機大臣曰據納世通等奏四十七等自霍罕轉回告稱額爾德尼迎接勅諭甚為恭敬以不能

親身入覲欲遣人代為賈奏並因冬寒不及預辦
方物俟來春料理起程等語額爾德尼尚屬恭順
所奏亦合情理但伊呈書納世通有云我讐人甚
多嗣後有讒謗我者祈將其人發來質對以辨真
偽等語雖屬畏罪之詞究因阿卜都喇伊木罪狀
似未顯著致伊蒙冤不白者然納世通覆書即應
將審明各確據逐一指出並以大臣等欲進兵問
罪大皇帝天恩念爾平日尚屬守分姑從寬免降

勅訓諭仍以嚴詞斥責伊自然知所做畏乃反云
阿卜都喇伊木之事業經蒙恩寬免無須再述是
其意若以前事為歉然者殊屬非是納世通辦理
此事始終怯懦著嚴加申飭併傳諭栢琨務遵陸
續所降諭旨加意奮勉毋再以姑息從事又

諭曰納世通奏准明瑞咨巴噶什巴雅爾斯坦之布
魯特搶掠哈薩克人口一事隨查投誠布魯特各
部落冊籍並無來咨名目恐係傳聞等語昨因明

瑞奏已傳諭納世通令其加意偵探雖據稱布魯特等名目未確但阿布勒比斯呈文亦有布魯特搶掠之語未必非額爾德尼詐稱辦理邊界搶掠事而暗與哈薩克交通此則頗有關係著仍遵前旨密訪確情不得顛預了事又四十七等至瑪爾噶朗查出綠旗兵劉偉係從前隨兆惠在葉爾羌為額爾德尼屬人所獲屢次脫出俱被伊卡倫盤獲看守等語瑪爾噶朗之人久經內附遇內地官

兵理應送回何敢拘禁看守著傳諭納世通於額爾德尼遣使之便傳諭申飭嗣後再有此等情事即行重究劉偉仍准回原營

甲午

諭伊犁將軍明瑞等酌辦哈薩克入

覲事宜

上諭軍機大臣曰據綽克托奏稱哈薩克額爾類等遣愛托和卓入覲貢馬并告稱布魯特等三次搶

掠游牧隨詰問愛托和卓云爾等一面情詞未足深信俟遣人赴布魯特查詢若果實情自當明正其罪若係爾等捏飾亦當以誣告論愛托和卓等辭屈即云所掠係塔什干游牧此等愚詐之徒若准其入覲似非體制謹酌賞紬緞酬其馬值送出卡倫等語所辦甚是看來明瑞等所奏阿布勒比斯遣人來告之語俱不可信明瑞等若似此窮詰伊或吐露實情亦未可定乃僅以一奏了事殊屬

顓頊著傳諭伊犁烏魯木齊將軍大臣等嗣後哈薩克等有懇請入覲者或係蘇爾統等大頭目及有奏請要事仍准其伴送前來若僅微末回人希冀賞賚俱照綽克托所辦飭諭遣回至大臣等辦事理宜和衷共濟若明瑞因綽克托如此陳奏即與之意見不合一切會商事件輒存形迹則是伊自負造就之恩矣併著傳諭知之

命議敘辦理烏魯木齊屯田總兵德昌等

上諭軍機大臣曰綽克托等奏烏魯木齊等處屯田
兵二千九百名共收糧五萬七千餘石可否將辦
理屯田之總兵德昌及管屯官員交部議敘兵丁
賞給鹽菜銀兩等語著照所請將總兵德昌及管
屯官員交部議敘兵丁各賞給一月鹽菜銀兩

乙未

諭伊犁將軍明瑞等管束安插戴罪回人事宜

上諭軍機大臣曰前因玉古爾阿奇木伯克阿卜都

賚勒索屬人阿克蘇伊沙噶伯克頗拉特妄行滋事與色梯巴勒氏等不和經各該大臣等叅奏審訊明確理應治罪朕念阿卜都賚之兄托克托於攻取庫車時効力捐軀頗拉特曾率所屬回人望風歸附俱加恩免罪送來京城安插看伊等近來頗知悔過自新而額敏和卓來京奏對又為懇請遣往伊犁安插因交與護送入覲回人之侍衛等照管前往伊犁但伊等素非安靜守分之人且額

敏和卓之子木薩現在伊犁管轄回衆或伊二人倚恃額敏和卓輒行肆志妄為亦未可定著傳諭明瑞等留心管束伊等若安分度日則已倘不知悛改該將軍等即行具奏請旨正法

癸卯

葉爾羌叅贊大臣額爾景額等疏奏拔達克山情形

額爾景額等奏言十一月二十三日侍衛楊桑

阿回自拔達克山告稱十月十三日至拔達克
山素勒坦沙跪聆

勅諭奏云素勒坦沙僻處邊隅不諳體制妄行陳奏
自知罪重今蒙

聖恩降勅訓諭惟有痛改前非以盡臣僕之分隨遣
親隨鄂斯敏伯克齎奏謝

恩并呈吐魯番郡王額敏和卓書函十二月二十日
至葉爾羌臣等面詢鄂斯敏所言無異除覆書

交鄂斯敏賚回外謹將奏章書呈驛出其奏章
云臣素勒坦沙謹奏十月十三日奉到

訓旨跪聆之下不勝感戴回人風俗凡事急圖表白
前此所奏今始知非惟有痛自改悔而已愛烏
罕原有搆怨之意今似不復相侵齊特喇爾之
地臣意欲仍行賞給實甚糊塗臣處有衆萬人
屬實但不知

天朝無給餉之例妄行瀆請嗣後惟有約束部落不

敢稍存異念以圖仰報

皇恩至額敏和卓臣稱之曰父何敢誹謗或因所遣
和濟克蘭造言生事今已嚴加懲治一切俱稟
遵

勅諭不敢稍有違悖謹奏其呈額敏和卓書云拔達
克山伯克素勒坦沙奉書吐魯番郡王接來諭
甚為欣悅我原以父相稱望王以我為子前遣
使人和濟克蘭至葉爾羌時大概添造語言奉

諭之後即將伊懋治專此辨明心迹尚望王於
大皇帝前善言陳奏謹呈臣等一併恭呈

御覽奏入報

聞

叅贊大臣綽克托等疏奏烏魯木齊耕牧情形
綽克托等奏言本年五月內臣等看得烏魯木
齊庫爾喀喇烏蘇兩處察哈爾厄魯特情形每
戶牧羊四十隻除每十隻交羊羔三隻及填補

倒斃數目外尚無虧缺臣等酌照前奏將來投
之厄魯特等於安插之日給與餉銀一年後再
行停止七月內烏魯木齊雨水霑足禾苗壯盛
招募內地民人開墾之地收成在十分以上又
據民人王世昌等一百三十戶呈稱我等俱係
內地無業貧民蒙

天恩賞給口糧移居烏魯木齊所有農器籽種及種
地馬匹俱係官辦准分年完項今獲豐收除來

年籽種口糧外尚有盈餘前日借項情願即行
交納臣等伏思分年還官之項並未督催伊等
既急公交納請將借出之餘糧四百七十二斛
有零照數交倉查民人等移居以來伐木采煤
養育雞豚竟成村落與內地無異奏入報

聞

甲辰

命准厄魯特策伯克安插伊犁

伊犂將軍明瑞等奏言十一月二十五日哈薩克阿布勒比斯遣屬人察噶賴等四名帶領厄魯特塔爾巴噶沁鄂拓克台吉策伯克來見譯出托忒字文書云策伯克於阿布勒比斯父在時曾為養子欲來歸附今將伊身及其幼子先行送來其家口俟來年春融續送但伊之母女妻子俱未出痘祈於伊犂就近安插等語臣等詢問策伯克所告相同察噶賴又云阿布勒比

斯欲遣使入

覬一時不得其人且畏哈密道遠可否准由烏里雅
蘇台行走臣等覆書准其代奏查策伯克從前
曾蒙

恩賞二品頂孔雀翎但係阿布勒比斯親信之人今
忽送來伊犁安插聞得策伯克有一女於今秋
同厄魯特巴朗來投或哈薩克等疑其內向因
欲脫回又聞哈薩克等懼我駐兵塔爾巴噶台

或令策伯克於伊犁安插可以潛通信息俱未
可定但看其人尚樸實亦非大台吉似可准其
安插伊家口至伊犁時策伯克仍來京

朝覲臣等暫將伊父子交總管碩通照看其或將伊
安插伊犁或乘伊入

覲歸途之便於烏里雅蘇台安插之處伏候

訓示奏入

工諭軍機大臣曰明瑞奏稱哈薩克阿布勒比斯遣

人帶領厄魯特台吉策伯克父子來投請安插伊犁明瑞等覆書俟奏聞請旨如蒙俞允俟與使人同至京師或在伊犁或在烏里雅蘇台安插之處未敢懸定等語所見尚未甚合機宜策伯克既誠心來投豈宜自定安插之地應曉示云厄魯特哈薩克俱大皇帝臣僕爾在哈薩克與在伊犁並無分別爾欲安插京師自當代為具奏今並不前往未便代奏等語即賞賚遣回亦可今既已允其所

請雖厄魯特舊台吉不應安插伊犁然伊不過塔爾巴噶沁之小台吉尚非綽羅斯可比即准其安插亦無不可若遷移於烏里雅蘇台則顯示防範形迹轉啟伊等猜疑且伊犁似策伯克之台吉亦多來春伊家口到時一切支給官項俱與伊犁之厄魯特一例辦理並不以台吉分例相待則久之自與衆厄魯特等一體著傳諭明瑞等遵照辦理

平定準噶爾方略續編卷二十七

欽定四庫全書

平定準噶爾方略續編卷二十八

乾隆三十年春正月己酉

陝甘總督楊應琚疏奏孳生馬匹事宜

楊應琚奏言查巴里坤牧廠前經奏准將安西
涼州肅州等處撥剩馬一千五百餘匹撥往孳
生自乾隆二十六年八月起至二十九年八月
三年屆滿按部定孳生例每兒騾馬三匹孳生

駒一匹臣以巴里坤水草豐美孳生必繁令弁
兵等據實開報較定額有贏無絀至烏魯木齊
節年貿易馬匹現存二千有奇多係驢馬應俟
將來雅爾駐兵廣通貿易再為撥解孳生至營
馬缺額例以五年為限踰限倒斃准其領銀買
補若以孳生抵補即無須動用官銀或未滿五
年則按其日月分別賠補如以廠馬補給其所
交價銀又可充公項是孳生補缺實於經費有

所搏節再巴里坤氣候較寒一至冬令必擇避
風向陽之處以資芻牧庶孽生馬匹日就蕃庶
奏入報

聞

癸亥

伊犁將軍明瑞等疏奏移駐雅爾官兵起程日
期

明瑞等奏言臣等前奏塔爾巴噶台駐兵所有

運送什物及存留烏魯木齊之項業經派定十月二十二日派索倫厄魯特官兵前行十二月初八日據報由奎屯前往至巴爾楚克西喇呼魯蘇一路看得地土平曠積雪亦厚可以車輛輓運又至齋爾山西沁達蘭嶺東哈布塔克扎克鄂博路看得伊犁烏魯木齊兩處官兵行走俱便可以合隊臣綽克托於來年正月初六日先領滿洲索倫兵起程臣納蘇懇於初八日領

滿洲綠旗兵護送糧餉農器等物起程臣明瑞
等於初三日領索倫兵六百名起程在中途合
隊臣緯克托總統前行沿途若有越界游牧之
哈薩克即行驅逐再原議雅爾駐劄官兵則勒
卜什招摩多等處仍須巡察臣明瑞派散秩大
臣碩通及侍衛官員領滿洲索倫察哈爾尼魯
特等官兵五百餘名以臣愛隆阿統領於初一
日起程越阿勒坦額默勒巡察勒卜什招摩多

一帶前赴雅爾與臣緯克托合隊查勘原立界址興作城工官兵全到後臣愛隆阿即回伊犁再臣愛隆阿至雅爾時即從前勘定之額敏河沿巴爾楚克沁達蘭三處安設大卡倫其沁達蘭與博羅塔拉相接之卡倫一處亦俱酌量安設俟副都統舒泰至雅爾時臣訥蘇懇遵

旨回京奏入報

聞

二月庚辰

諭定邊左副將軍成衮扎布等辦送伊犁牛隻事宜
上諭軍機大臣曰明瑞等奏稱伊犁屯田回人所用
牲隻頗多請交成衮扎布等從烏里雅蘇台購辦
孳生牛一千餘隻乘今秋草茂時解送等語著傳
諭成衮扎布等烏里雅蘇台如現有牛隻即照數
撥送或有不足則喀爾喀四部落來年應交馬二
千餘匹著照從前改折孳生牛隻解送伊犁併傳

諭明瑞等知之

命賞哈薩克多羅特拜等頂翎

上諭軍機大臣曰明瑞等奏稱塔爾巴噶台邊界居住之哈薩克多羅特拜庫圖什頗能抒誠効力現又查出察哈爾及回人呈獻似應加以賞賚等語多羅特拜著加恩賞給四品頂孔雀翎庫圖什賞給六品頂藍翎以示鼓勵

丁酉

伊犁將軍明瑞等疏奏各城資送屯田回人全抵伊犁

明瑞等奏言查各城遷移屯田回人共一千七百九十六戶俱陸續到齊計五月以前所需口糧照臣等原奏給發六月麥收將屆尚需一月口糧交吐魯番公木薩通融辦理又據葉爾羌伯克等稟稱所有捐助口糧因天寒路遙尚屬不足祈令木薩代為辦理俟歸日償還臣以此

項口糧為數無多免其取償至回人等所帶牲
隻即可為屯田之用有不足再為撥補又據庫
爾勒哈子伯克阿璫稟稱從前塔里雅沁回人
遷居伊犁其多倫回人甚為羨慕今現有三十
戶情願自備資斧移來屯田臣等查伊犁地畝
寬廣此三十戶回人既情願前來似應准其一
體安插奏入報

聞

戊戌

諭散秩大臣伯伍彌泰等酌停購買屯田馬匹

上諭軍機大臣曰伍彌泰等奏稱烏魯木齊屯田尚
需馬六百九十二匹行文伊犁請給經明瑞等以
伊犁現亦需用俟貿易有餘再行撥送擬派員購
買每匹估給價銀八兩等語辦理殊屬錯謬烏魯
木齊等處數年來積貯頗豐倘屯田馬匹稍有缺
額即先將現在馬匹供用其不敷者亦無妨少緩

且哈薩克貿易馬匹纔值銀二三兩今以銀八兩購馬一匹頓增三四倍矣著傳諭伍彌泰所購馬匹如業經給價則已否則毋庸購買並傳諭明瑞等知之

壬寅

葉爾羌叅贊大臣額爾景額疏奏辦理博洛爾部落事宜

額爾景額等奏言前據博洛爾伯克沙瑚沙默

特遣伊弟阿玉卜稟報齊特喇爾伯克邁瑪特
什丕與伊弟海魯蘭合謀搶伊村莊臣等譯看
來呈其如何搶掠之處未經聲明及詢之阿玉
卜察其情形係兄弟相爭隨行文勸諭今據膏
丈前往之回人素勒坦尼咱爾告稱沙瑚沙默
特及邁瑪特什丕等叩接文書不勝感激邁瑪
特什丕隨往博洛爾與沙瑚沙默特誓共和好
又伴送至海魯蘭處海魯蘭即具呈令伊叔沙

里斯隨同前來等語臣等譯看三人呈詞乃知沙瑚沙默特平日勞苦所屬回人與伊弟海魯蘭不和又奪邁瑪特什丕之妹故海魯蘭乘便邀約搶掠村莊今已各知其非復相和好似不必再為深求但伊等性情貪鄙若不為分別是非嚴加申飭則將來互行瀆竄殊覺煩瑣臣等按其呈內情形虛實仍各行文曉諭並賞給來人口糧羊隻送出卡倫奏入報

聞

閏二月乙卯

阿克蘇辦事副都統卞塔海疏奏烏什回人作
亂情形

卞塔海等奏言二月十五日申時據駐劄烏什
沙圖臺站委署護軍校全福哈密通事回人呢
雅斯等報稱本月十四日夜三鼓烏什城內回
人忽然聚譟施放烏鎗致傷綠旗兵丁副都統

素誠會同阿奇木伯克阿卜都拉登山拒守一面遣人速報等語臣等詢問全福起事緣由據稱因辦送沙棗樹料派出回人二百四十名令於十五日起程所派回人等於十四日夜忽然作亂臣等即整齊官兵臣卞塔海帶領星夜前往救援臣德福防守阿克蘇城池其喀什噶爾葉爾羌庫車賽里木拜等處俱已分途飛報奏

入

上諭軍機大臣曰卞塔海等聞烏什城內回人滋事
即領兵前往又咨行各城策應同日鄂寶明普高
庭棟俱奏稱派兵前往烏什回人作亂尚未得起
釁確情著傳諭栢琨額爾景額等如栢琨正抵烏
什即將此事查辦所有起釁回人務嚴行根究正
法以示懲創仍即曉諭各城回衆令其各安生理
毋得驚恐栢琨如已過烏什即著額爾景額前往
辦理再辦送沙棗樹科其事甚屬微細何必派出

如許回人以致激成事端或素誠及綠旗兵丁平日擾害伊等致不能堪適因此事遂爾舉發亦未可定栢琨等辦理竣事時將素誠平日有無擾害回人情事一併查明具奏

丁巳

阿克蘇辦事副都統卞塔海疏奏烏什逆回情形

卞塔海奏言臣於二月十五日領滿洲索倫馬

兵一百名綠旗步兵二百餘名回兵一百餘名
并喀什噶爾護送回人至阿克蘇兵五十名起
程前往烏什沿途所有村莊俱經安撫十六日
抵烏什之喀喇和卓據哨探兵見有賊八百餘
臣即整兵迎戰放鎗攻擊賊俱敗走追至城外
捉生詢問據供二月十三日素大人與阿奇木
伯克阿卜都拉派出回人解送沙棗樹科有伯
克額色木圖拉及伊子賴黑木圖拉等忽於三

鼓時招集回人焚劫倉庫素大人及官兵俱被害伯克阿卜都拉現被拘禁等語臣與官兵等即將烏什城外關隘俱各據守十七十八兩日晝夜交戰殺賊百餘人得烏鎗三十餘桿十九日有馬步賊人二三千名出城接戰因衆寡不敵雖殺賊百餘人官兵陣亡者亦約有七八十名臣與官兵現在哲爾格濟克德屯駐知會德福添調兵丁策應其葉爾羌喀什噶爾兵丁亦

經催取赴援今尚未至奏入

上諭軍機大臣曰卞塔海奏伊領兵前往烏什捉生
詢問知駐劄大臣已為逆回戕害現在據城聚眾
抗拒官兵等語初意回人小有變亂或不過械鬪
案件今乃戕害官兵焚劫倉庫此固素誠等平時
辦理不善以致滋事而回人等敢行叛亂情罪可
恨若不盡行勦絕將來駐劄大臣何以辦事適據
明瑞奏一聞德福所報信息即派觀音保領兵前

往此時納世通額爾景額應亦赴援自可計日蕞
事但逆回潰敗之後必分路潛逃斷不可防範稍
踈致使漏網倘有投往額爾德尼伯克處之人即
向伊索取此時卞塔海等辦理若何仍作速奏聞
伊犁將軍明瑞疏奏派兵應援烏什情形

明瑞奏言二月二十一日未時准德福將烏什
回人作亂卞塔海領兵往援知會到臣查葉爾
羌喀什噶爾阿克蘇等處滿洲索倫兵丁分管

臺站勢難一時調集臣酌量先派精兵五百名
令副都統觀音保即刻起程由穆素爾嶺前行
揚言臣率領大兵隨到若烏什業經平定即將
官兵撤回臣亦即整齊官兵相機進止如一時
不能竣事擬將庫貯辦理伊犁等處事務大臣
之印取出委派大員辦事臣帶將軍印領兵前
往烏什伊犁地方緊要現在愛隆阿巡查哈薩
克邊界未能即回鄂津亦難獨辦惟烏魯木齊

有伍彌泰五福李景高三員臣酌調伍彌泰辦理伊犁事務俟愛隆阿到日再令接管奏入

上諭軍機大臣曰今日據卞塔海奏伊領兵前往烏什知素誠已被戕害連日與賊相持等語正欲諭明瑞領兵往辦適據奏至已令觀音保前往應援加以各城陸續出兵諒逆賊無難擒戮茲命明瑞前往非專為勦賊特令其詳察起釁情由大臣等駐劄新疆平日失於撫馭惟偏護內地人等恣意

擾害回人及債事後又復張皇失措為若輩所輕
視即如派送沙棗樹科何至二百人之多其為辦
理不善顯然再烏什原係霍集斯駐劄之地或伊
屬人聳衆生事亦未可定明瑞此行固不宜輕縱
回人亦不可偏護官兵務得其實情加以懲創始
於地方有益俱著據實奏聞

阿克蘇辦事布政使德福疏奏逆回通信霍罕
情形

德福奏言卞塔海領兵應援烏什後臣續辦阿克蘇兵丁有現署阿奇木事務之伊沙噶伯克薩里係烏什人臣正與商派兵丁接續行糧二月十九日伊弟額伊敏從烏什脫出告知逆回等抗拒官兵情形並稱逆回等派我與噶雜納齊伯克沙資雅東及安集延四人交付元寶十九個令送與霍罕額爾德尼伯克求其應援我念兄薩里現在阿克蘇行至畢德爾山嶺住宿

起回人睡熟脫出報信等語臣思布魯特安集
延俱距喀什噶爾甚近隨速行知會一體嚴加
防範奏入得

旨額伊敏為賊所遣乘間脫出報知信息殊屬可嘉
著傳旨嘉獎仍賞緞五疋

已未

諭伊犁將軍明瑞查辦霍罕事宜

上諭軍機大臣曰昨據德福奏烏什噶雜納齊伯克

沙資雅東等為賊遣往霍罕求援於額爾德尼伯克有同行之額伊敏脫出送信等語額爾德尼伯克前與阿卜都喇伊木互相通信今沙資雅東等數人內或有阿卜都喇伊木親戚意圖報復或額爾德尼伯克尚有通信往來之事亦未可定明瑞至烏什時亦當留心查明如額爾德尼伯克果有此等情事即藉此移兵進剿事平後霍罕雖不必駐劄大臣自可另授伯克管理俱著據實奏聞

諭吐魯番郡王額敏和卓實陳辦理回部情形

大諭軍機大臣曰回部自內附以來朕加意輯寧俾各安生理豈意烏什回人等忽戕害官兵搶掠倉庫情固可恨或因駐劄大臣等平日失於撫馭綠旗官兵又復恣意擾累伊等不得已而出此又或阿卜都喇伊木親戚人等與霍罕額爾德尼伯克潛通信息煽誘妄為俱未可定額敏和卓曾與新柱同辦事務新柱有無擾累回人及各城大臣所

行若何著傳諭額敏和卓伊係効力年久之人各
大臣辦事情形及回人情事自必深知伊有所見
聞當據實具奏不可纖毫隱匿再額爾德尼伯克
倘有通信形跡額敏和卓意中應作何辦理並著
籌酌奏聞

命原任伯克阿卜都賚等仍在京安置

上諭軍機大臣曰額敏和卓入覲時曾請將獲罪安
置回人阿卜都賚頗拉特發往伊犁居住已如所

請交帶領入覲回人侍衛等便道送往伊犁今烏
什回人既經叛亂此阿卜都賚等素非安靜之人
或在伊犁滋事亦未可定阿卜都賚頗拉特不必
送往伊犁即著侍衛素勒帶回京師照舊安置

庚申

命尚書阿桂等即赴伊犁辦事

上諭軍機大臣曰前諭阿桂明亮俟朕南巡旋蹕時
再請訓前往伊犁今明瑞既往烏什著傳諭阿桂

明亮不必守候回鑾即馳驛至行在請訓前往伊犁辦事

諭進勦逆回將軍大臣等和衷集事

上諭軍機大臣曰此次進勦烏什逆回各城大臣俱領兵會合但必號令歸一方克有濟額爾景額至烏什之時即著總理軍務或觀音保先至亦可暫總其事以待額爾景額之來明瑞一至伊本係將軍自應節制各城官兵再各城大臣等會合一處

尤當和衷商辦以期集事斷不可各存意見烏什之事想計日可竣但恐逆回等見官兵陸續全到或逃往霍罕投額爾德尼伯克并傳諭該將軍大臣等務於緊要關隘處所選派官兵加意瞭望擒拏勿令兔脫

諭阿克蘇辦事布政使德福籌辦軍需及酌派伯克事宜

上諭軍機大臣曰據德福奏稱阿克蘇庫貯軍器火

藥所餘無幾恐各城官兵至日不敷配給已行文喀什噶爾葉爾羌大臣速由臺站運送等語所辦未合機宜軍器火藥自屬緊要但各城大臣既領兵會勦自必攜帶豈有專俟阿克蘇預備之理況此時各臺站俱有回人有事之秋保無心懷叵測妄行攘奪德福何見不及此再所奏阿克蘇辦事不可無大伯克因行文楊應琚等催色梯巴勒氏於入覲歸途之便馳驛速赴該處尚屬可行色梯

巴勒氏抵阿克蘇日即留彼辦事至薩里係烏什人父母兄弟俱在彼處自必備知其詳著派往卞塔海軍前効力俱傳諭知之

癸亥

副都統卞塔海等疏奏庫車官兵協勦逆回情形

卞塔海等奏言二月十七日至十九日臣卞塔海屢與賊戰二十四日臣栢琨等領庫車官兵

回人等至哲爾格濟克德拏獲烏什逃回尼咱
爾默特臣等研訊烏什馬賊六百餘人步賊二
千餘人現在傷斃二百餘人并聞向布魯特求
援等語又訊得首惡係魯克察克村之四品頂
帶孔雀翎伯克額色木圖拉及伊子虛銜五品
頂帶藍翎賴黑木圖拉連木齊木五品頂帶伯
克額穆爾烏拉又雅爾村五品頂帶哈子伯克
和普爾五品頂帶孔雀翎密喇卜鄂碩爾又什

呼勒伯克瑪瑪里木等率衆與大兵抗拒及分
辦城內事件今所屬回人等雖被迫脅因度日
艱難常懷怨恨看來伊等俱以耕牧為生今廢
時失事必然內潰似無難計日掃除奏入報

聞

諭叅贊大臣納世通嚴辦烏什逆回

上諭軍機大臣曰據納世通奏稱接卞塔海烏什回
人作亂信息一面傳檄招撫隨帶領官兵起程等

語納世通初得信息尚不知逆回有戕害大臣搶掠倉庫之舉是以意在招撫今既知逆回等肆惡情形斷難曲宥納世通額爾景額等務期大示懲創不可稍存姑息

甲子

諭伊犁將軍明瑞等烏什駐劄官兵毋庸先事派調上諭軍機大臣曰德福奏稱平定烏什後總辦事務及倉庫城池卡倫俱須人甚急如官兵員缺必俟

內地派補未免遲滯請先從阿克蘇官員內挑選
數人隨大臣辦事所用兵丁亦交楊應琚酌派等
語烏什辦事雖須用官兵頗多但隨明瑞前往之
人即可令其暫行辦事並調取所用兵丁無不可
者不必先事張皇向各處調取并傳諭德福知之
命獎賞協助牲隻之伯克薩里等

上諭軍機大臣曰據德福奏稱卞塔海領兵前往烏
什伯克薩里等助馬一百匹今因運送口糧又與

阿卜都噶普爾并請助牛二百頭又賽里木阿奇
木伯克阿瓜斯伯凱署拜城阿奇木伯克阿爾租
默特亦請每城助馬一百匹等語薩里等急公効
力協助牲隻甚屬可嘉自當示以獎勸所助牛馬
俱著賞給價值仍將朕加恩獎賞之意傳諭伊等
知之

丁卯

申諭伊犁將軍明瑞等確查阿卜都拉等附逆情節

上諭軍機大臣曰卞塔海等奏擒獲烏什回人額伊敏供稱駐劄大臣等從前派出屯田回人前往伊犁所購馬匹牲隻及採買官糧均未給價又將瘦羊四百隻每隻令回人繳價四兩此項銀兩俱係哈密回人侵蝕至運送沙棗樹料之時賴黑木圖拉兄弟謀逆伊父額色木圖拉阻止不從因在素誠署前放火折屋素誠與阿卜都拉殺賊數人後見賊勢愈衆先殺其子復行自盡阿卜都拉被擒

以女與賴黑木圖拉之子為妻始未殺害等語前據捉生訊問阿卜都拉被回人拘禁朕尚以阿卜都拉係玉素富之弟必不肯屈節今觀伊平日縱容所屬侵蝕回人銀兩又納女於賴黑木圖拉希圖臨難苟免此與叛逆何異豈可以其為玉素富之弟遂從寬貸著傳諭明瑞伊至烏什之日務將此等情節查訊明確若果所傳不妄非獨逆回等當族誅示懲即阿卜都拉亦宜明正典刑其運送

木植累派回人之處俱著查明具奏

諭將軍大臣等辦理烏什事宜

上諭軍機大臣曰據德福奏稱卡塔海等等送烏什
賊人數名交薩里訊問等語卡塔海等一有俘獲
即應研訊情形乃轉送德福德福又委之薩里據
所供亦無關緊要何不於軍前正法又煩遠送朕
意或越將軍大臣等未至之先揚我軍聲釋放伊
等回城令其傳說使賊人內潰此亦取烏什之一

策卡塔海總未計及看來伊識見甚小不過接戰
數次即束手無策徒日望援兵之至此時倘逆回
等聞風免脫又如雅爾哈善之取庫車則伊等罪
尤難逭且辦理烏什亦不必定以克城為急惟嚴
加防範俾無從得食自可計日就擒俱著傳諭知
之

己巳

伊犁將軍明瑞疏奏進勦烏什起程日期

明瑞奏言臣前遣觀音保領兵五百名先往烏什應援二月二十五日聞烏什大臣官兵被害又聞卞塔海未能即獲賊首臣自應領兵前往除愛隆阿巡查邊境領兵一千二百名觀音保領兵五百名外臣隨派滿洲索倫察哈爾兵一千一百餘名阿奇木伯克公木薩願領回兵二百名閏二月初四日渡河初五日起程由穆素爾嶺前往又派索尼爾圖往迎愛隆阿如尚未

起程不必使哈薩克等聞知惟密告知綽克托
即回伊犁駐劄臣伏思逆回等聞官兵漸至或
逃入布魯特等處自應早為堵截一面行文德
福與納世通會商如兵不能分俟與觀音保會
商辦理奏入報

聞

伊犁將軍明瑞等以伊犁河新築滿洲駐防城
及喀什回人新築城工告竣奏請

賜以嘉名尋

欽定伊犁河駐防城名曰惠遠東門曰景仁西門曰
說澤南門曰宣闔北門曰來安其哈什回城名
曰懷順

壬申

叅贊大臣納世通疏奏會勦烏什逆回情形

納世通奏言臣自阿喇古選兵二百名先行圍
二月初三日在烏什之鄂托巴什駐營次日領

隊逼城有賊百餘出戰放鎗合陣一次俱回城
中臣與卞塔海會合約於初六日巳時夾攻取
城初五日賊人見臣兵少突出馬步千餘入四
面攻圍臣領兵施放鎗砲大戰一次擒賊四名
賊人敗走入城官兵得傷者三人臣一面派卞
塔海隊內翼領良福領馬兵百餘名回人二百
名至巴什雅克瑪沙圖兩處卡倫堵截賊人逃
走之路又傳諭布魯特十四部落令其拏送逸

賊母得容留奏入

工諭軍機大臣曰納世通奏領兵至烏什與卡塔海
會合攻城擊敗賊人等語看來賊勢窮蹙聞我兵
陸續前往必畏懼潛逃今卡倫防範既嚴縱有逃
脫者不過往布魯特等部落伊等焉敢容留倘稍
有抗違自可一併辦理至烏什回人所傷官兵事
定後自當查明優卹惟素誠咎由自取不得入於
請卹之數

諭將軍大臣等詳查陣亡官兵察靈阿等請卹

上諭軍機大臣曰德福奏稱巴什雅克瑪駐劄卡倫
侍衛巴哈布同護軍兆明額等十二人至阿克蘇
告稱伊等前往烏什支領錢糧夜半聞亂即縋城
約會卡倫人等前往應援行至古古爾魯克因附
近回人俱亂更相爭戰護軍校察靈阿等八人陣
亡餘人脫出稟報等語巴哈布等之言未可遽信
為實但察靈阿等如果遇賊陣亡著明瑞等辦理

烏什事竣後詳查奏請優卹

癸酉

副都統卞塔海等疏奏勦賊官兵回人功次
卞塔海等奏言臣等聞納世通已至約於初六
日兩路進兵夾攻賊人馬步兵俱於近城樹林
內列隊以待我兵即施放鳥鎗庫車回兵及綠
旗兵往奪樹林賊人又移隊於城牆之下或入
或出不時誘戰而城濠甚深賊可藏匿間有傷

者我兵亦有受傷之人正在合戰舒泰又領葉爾羌兵前來戰至日暮賊人數千衝突而前復嚴隊以待奮力一戰賊始退走殺賊百餘人我兵陣亡者一名次日黎明賊復列隊臣等不時遣人誘敵賊不敢入用鎗箭射回此次合戰左右兩翼賊人來犯

乾清門侍衛訥蘇玉麟侍衛傅昌喀蘭泰巴爾賽阿克蘇委署章京職銜塔尼琿帶索倫兵三十

餘名喀什噶爾兵六十餘名奮力衝殺又遊擊
富昌阿都司倭赫六黑喀什噶爾護軍校烏爾
訥老肖等庫車阿奇木伯克鄂斯璊領庫車回
兵沙雅爾伯克阿三阿克蘇伯克呢雅斯五品
伯克額伊默爾等俱係奮勉出色之人奏入得
旨此次進勦賊人之管隊侍衛訥蘇等及各城伯克
奮勉可嘉著明瑞納世通等存記俟平定烏什後
一體奏請交部議敘

乙亥

叅贊大臣納世通疏奏預籌堵禦逸賊及獎賞
布魯特等事宜

納世通奏言臣前奏請派翼領良福領兵堵禦
賊人之路彼時因良福尚未前來臣親領官兵
前往堵禦餘兵交與主事烏爾袞藍翎侍衛官
長保翼領永善叅將五十六於賊人四面進攻
賊見我兵少衝突數次俱被擊敗殺賊二十餘

名是夜良福兵到即令其前往巴什雅克瑪一
帶嚴防臣於初七日奪取城西之山殺賊三十
餘名看賊情形自知罪重且慮防範嚴密惟據
險死守未必逃遁但大兵相逼甚急亦難預料
所有堵禦之兵須強壯者方能濟事今伊犁兵
亦將次到齊俟觀音保至日臣與商議選兵防
守要害乘機擒縛賊人又希卜察克布魯特散
秩大臣阿奇木冲噶巴什布魯特比阿瓦勒聞

臣領兵前來各領布魯特兵隨至途遇呼什齊
部落那喇巴圖之侄亦情願隨軍効力臣加以
獎諭與我兵一體支給行糧再布魯特等甚愛
順翎請視其出力之處酌量賞給再行彙奏

聞

平定準噶爾方略續編卷二十八